

1 John

Tiroma Leta

John Mo Ulia

Leta Nike

John mo opoia vara tamlohi la rasua vara God i pa řomiřa hin rani atu vara la taviti na nořa hehe (1.9).

Tamlohi la vujangia vara la rasua varařuhu vara la lo opoi opoira (3.11–24). Matan God enia opoia, nona tamlohi varařuhu la pa sohena (4.1–21). Vara tamlohi rasua la jeu na nora hehe la pa hahau na malelen opoiopoira, ale la rasua vara Iesu Natun God enia Jujuri varařuhu mo mai tamlohi vara i mate matařa (5.1–12).

‘Reti matan mauri atu mo lo toho tuai tiroma na pongi tiroma,

... haratu kama hitea na matamam’ (1.1)

Hin leta nike

1. Reti non God mo sile na mauri (1.1–4)
2. God enia malarani, Křisto enia nořa tovongi (1.5–2.6)
3. Retileu paro (2.7–17)
4. Meresahi non Křisto peresi na tamlohi non God (2.18–3.10)
5. Opoia non God peresi na nořa opoia (3.11–4.21)
6. Jeu na varama (5.1–21)

Reti Sei Mo Sile Na Mauri

¹ Kama lo vereuli kamim na reti mata mauri atu mo lo toho tuai na pongi tiroma, haratu kama rongoa, haratu kama hitea na matamam, ale haratu kama kilaua, ale kama tikelia na limamam tataholo, ² mauri atu mo pala, kama hitea, ale kama lo vereuli na sava kama hitea moiso. Nake, kama lo vere kamim hin mauri tui atu, haratu mo

lo toho peresi God Tama, ale nake mo asi isaña. ³ Kama lo vere varaŕuhu na sava kama hitea, ale kama rongoa matan vara ha pa eñi lavi na mauri tui sei peresi kamam, moiso enña ŕa pa matea peresi Tama enia Natuna, Iesu Křisto. ⁴ Kama lo uli na hinau tari isamim matan vara ha pa avulahi jea.

God Enia Malarani

⁵ Haranike enia Retiŕuhu kama rongoa isana, ale kama lo vereea isamim: God enia malarani, ale mo sopo te řořoha hinia.

⁶ Vara ŕa vereea vara ŕa lavi na mauri peresi God, ale ŕa lo toho na řořoha, enña ŕa lo halu, ŕa sopo hahau usuri na retivaraŕuhu. ⁷ Pani vara ŕa lo hahau na malarani sohen God mo lo toho na malarani, enña ŕa pete pulutahi hin mauri atu moiso peresi na tatuaña, ale řaen Iesu Natuna mo lo hoje nařihi na noña sasati. ⁸ Vara ŕa vereea vara mo sopo te noña sasati, ŕa lo haluŕa haseña, ale retivaraŕuhu mo sopo toho isaña. ⁹ Vara ŕa taviti na noña sasati isan God, God i pa vai na hina tataholo sohen mo vereea isaña moiso mara, i pa řomi na noña hehe, ale i pa vai na noña hehe tari la sopo vaiña ŕa lumiha na nahona.

¹⁰ Pani vara ŕa vereea vara ŕa sopo vai te hina sasati, ŕa lo vereea vara God enia tamlohi halu matea, ale nona reti mo sopo toho isaña.

2

Křisto Mo Tueniña

¹ La natuku, na lo uli la hinau sei matan vara ha sopo vai na hina sasati, pani vara ha vai na hina sasati, noña tuetueni matea mo lo toho peresi God Tama, enia Iesu Křisto haratu mo tataholo. ² Křisto mo hase silea vara i voli nařihi na noña sasati, pani mo sopo matan noña haseña, pani peresi na hina sasati nona tamlohi tari na varama.

³ Āa lo levosahia vara řa levosahi God hin malele akerihi: Āa lo levosahi God vara řa lo ooloo na nona retileu. ⁴ Vara tea mo vereā vara mo levosahi God, pani mo sopo ooloo na nona retileu, enia tamlohi halu, ale hina varařuhu mo sopo toho isana, ⁵ pani haratu mo lo ooloo na nona reti, opoia non God mo jea varařuhu isana. Hin malele nike, řa pa levosahi i řuhu vara enřa řa lo toho hinia: ⁶ haratu mo vereā vara enia mo lo toho hinia, enia i pa hahau sohen Křisto mo hahau.

Retileu Paro

⁷ La tapalaku řuhuřuhu, na sopo uliuli isamim matan vara a mele sile kamim hin te retileu paro, pani enia pa haratu la lo sile kamim hinia tiroma moiso, ale enia retireti atu ka pete rongoa moiso, ⁸ pani retileu atu na lo ulia isamim mo sohena retileu paro matea, ale mo lo toho na maurin Křisto peresi na maurimim, matan ka hite na řořoha mo lo majara, ale malarani varařuhu mo lo sasarami moiso.

⁹ Haratu mo lo vereā vara mo lo toho na malarani, pani mo lo hitesatihi na voraina, enia mo pa lo toho na řořoha mo tikeli nake. ¹⁰ Haratu mo lo opoi na vorain Křisto, enia mo lo toho na malarani, ale mo sopo tea i eři jalio mata nona vavahinau. ¹¹ Pani haratu mo lo hitesatihi na vorain Křisto, mo pa lo toho na řořoha, mo lo hahau na řořoha, ale mo sopo levosahi na jara mo lo vano ea, matan řořoha mo vusohi na matana.

¹² La natuku, na lo uliuli isamim matan nomim sasati God mo řomiřa matan Křisto. ¹³ La haratu la vajiaha, na lo uliuli isamim matan ka levosahi haratu mo lo toho atu tiroma na tapulon vavahinau. La uluvou, na lo uliuli isamim matan ka jeu Tiapolo enia pulo sasati. ¹⁴ La natuku, na lo uliuli isamim matan ka levosahi Tama moiso, ale la vajiaha, na lo uliuli isamim matan ka levosahi haratu mo lo toho tiroma moiso na tapulo vavahinau. La

uluvou, na lo uliuli isamim matan ka suiha, ale reti non God mo lo toho hin kamim, ale ka jeu haratu enia pulo sasati.

¹⁵ Ha sopo opoi na varama teni te hinau non varama. Vara ha opoi na varama, ha pa eři opoi Tama sohena sava?

¹⁶ Matan hinau na varama mo sohen harihi: řomjea na masalom sasati, řomjea na hinau ko hitea, hapahapa na nom hinau, ale la hinau sei la sopo tai isan Tama, pani la tai na varama purongo, ¹⁷ moiso varama sei mo lo vano vara i tihai peresi na masalona tari, pani haratu mo lo vai na masalon God enia i pa toho jejeu.

Meresahi Non Křisto La Pala

¹⁸ La natuku, nake enia isoiso rani. Sohena ka pete rongoa moiso vara meresahi non Křisto la lo mai, ale meresahi matuvana non Křisto la pala moiso, ale matana řa levosahia vara pongi hitahu mo mai moiso. ¹⁹ Hina purongo vara la tamlohi atu la tai na vaořa, pani enira la sopo tatuařa. Vara la pa lo tatuařa varařuhu, la pa lo toho peresiřa. Pani la malue isařa matan vara i memera vara enira la sopo tatuařa.

²⁰ Pani kamim mo isoiso ka levosahi harihi moiso, matan God Tapu mo viřoni kamim. ²¹ Na sopo uliuli isamim matan ka sopo levosahi na retivarařuhu, pani matan ka levosahia moiso, ka pete levosahia moiso vara retihaluhalu i pa sopo eři tai isana retivarařuhu. ²² Hare natu, enia tamlohi halu, haratu sei mo lo verea vara Iesu enia mo sopo Křisto varařuhu sei God mo viřonia. Vara tea mo verea sohena, enia natu, meresahi non Křisto, matan mo řohu hin Tama peresi Natuna. ²³ Haratu mo řohu hin Natuna mo sopo lavi Tama. Pani haratu mo verea vara Iesu enia Natun God, Tama mo lo toho peresia. ²⁴ Moiso, vara ha turu řilangi tarea na sava retireti ka rongoa tiroma moiso, ale ha pa lo matea na mapumim peresi Tama enia

Natuna. ²⁵ Mauri tui enia retitauhi sei mo retitauhi hinia isařa.

²⁶ Enau na lo uliuli isamim matan la haratu la lo tikauleji kamim, ²⁷ pani Křisto mo viřoni kamim na Tanume Tapu, ale mo lo toho hin kamim. Ale kamim ha pa sopo mele opoi te tamlohi vujangi tinapua vara i vujangi kamim. Pani mo řuhu vara ha toho hin Křisto, ale ha usuri na sava hinau Tanume Tapu mo vujangi kamim hinia matan hinau tari mo vujangia mo varařuhu, mo sopo te hina halu hinia.

La Natun God

²⁸ Natuvarihi, mo řuhu vara ha toho jejeu hin Křisto, matan vara hin rani atu i mele mai, řa pa sopo eři matahu, ale řa pa sopo mahanuhanu hin te hinau hin rani atu, ²⁹ matan ka levosahia vara Křisto mo tataholo, ha pa levosahia sohena vara haratu mo lo vai na hinau mo tataholo, enia mo vora isana.

3

¹ Ka hite na opoia tavera non God Tama isařa mo sohena sava, matan mo toviřa vara enřa natuna, ale mo sohen haratu natu. Pani tamlohi varama la sopo levosahiřa matan la sopo levosahi God Tama. ² La tapalaku řuhuřuhu, enřa natuna nake, pani mo sopo pala vara řa pa sohena sava hin pongi hitahu, pani řa levosahia vara hin pongi atu Křisto i mele pala hinia, enřa řa pa sohen Křisto, matan enřa řa pa hitevosahia i řuhu vara enia mo sohena sava. ³ Ale la haratu la řomtoho sohen harihi, la hase vaira la vokevoke řuhu, sohen Křisto enia mo vokevoke řuhu.

⁴ La haratu la lo vai na hehe tarea, enira la lo vaivaileu tarea, ale hehe enia vaivaileu. ⁵ Ale ka levosahia vara Křisto mo pala vara i lavi nařihi na hehe, ale mo sopo te hehe isana. ⁶ Haratu la lo toho isana la sopo eři vai na hehe tarea, vara tea mo hehe tarea enia mo sopo levosahi Křisto, ale enia mo sopo hitevosahia teni levosahia hin te rani.

⁷ Natuvarihia, ha sopo tinañihia vara tea i halu kamim! Harepu mo vai na hinau tataholo tarea enia mo tataholo mo řuhu sohen Křisto mo tataholo. ⁸ Harepu mo lo hehe tarea enia non Tiapolo. Tiapolo mo lo hehe tiroma na tapulo varama mo tikeli nake. Pani Natun God mo mai vara i pa vaikomokomo na vavahinau non Tiapolo. ⁹ Haratu la vora isan God, la sopo eři vai na hehe tarea matan suihan God mo lo toho na maurira, mo vaira la mai natuna, ale matan haratu la pa sopo eři vai na hehe tarea.

God Enia Opoia

¹⁰ Ha pa levosahi la haratu la natun God isan la haratu la natun Tiapolo sohen harihi: haratu la sopo taura vara la vai na hinau i tataholo tarea la sopo non God, ale sohen haratu, la sopo opoi na voraira. ¹¹ Pani retisohai sei enia retisohai atu ka rongoa moiso na pongi tiroma vara, řa pa opoiopoiřa, ¹² moiso, vara ha sopo sohen Cain atu tuai sei mo vilimatei tasina, enia non Tiapolo. Mo vilimateia mata sava? Mo vaia matan tarea tasina enia mo lo vai na hinau mo lo tataholo, pani enia mo lo vai na hinau mo lo hehe matan enia tamlohi hehe. *Gen 4.8*

¹³ La voraiku peresi na vevoraiku řuhuřuhu, ha sopo mařurahi tavera vara tamlohi varama la řohu hin kamim. ¹⁴ Řa levosahia vara řa tai na mateia moiso řa vano na mauri moiso matan řa opoi na voraiřa kalesia. Pani haratu mo sopo te nona opoia, enia mo pa lo toho na suiha mateia.

¹⁵ Vara tea mo lo hitesatihi na voraina, enia tamlohi vili tamlohi matea moiso, ale ka levosahia vara mo sopo te tamlohi vili tamlohi hatea vara mauri tui mo lo toho isana.

¹⁶ Řa levosahia vara opoia varařuhu enia hin posposi sei; Iesu mo sile na maurina matařa, ale matan haratu, mo řuhu vara řa sile na mauriřa mata vorai kalesia tinapua.

¹⁷ Ale matana, vara tea nona hinau mo matuvana, ale mo hite na vonana matea mo vejuveju na hinau matea,

pani mo sopo tuenia, opoia non God mo lo toho hinia sohena sava? ¹⁸ Natuvarihi, řa sopo retireti vono purongo, pani řa pa opoi na tinapua na nořa vavahinau peresi na retivarařuhu.

¹⁹ Vara řa opoi na tinapua řa lo vujangia vara enřa non retivarařuhu, ale řomiřa la sopo tialahalaha na nahon God, ²⁰ hina purongo vara řomiřa la lo ariřa hin te hinau, God mo aulu na řomiřa, ale enia mo levosahi na hinau tari la varařuhu. ²¹ La tapalaku řuhuřuhu, vara řomiřa la sopo hase ariřa na nahon God, enřa řa pa eři řomřilangi vara řa mai mariviti isana, ²² moiso enia i pa sileřa na sava hinau řa usia isana matan řa opoia vara řa oloolo na nona retileu, ale tarea řa lo vai na sava God mo avulahi hinia. ²³ Ale God mo sile nona retileu akerihi: vara řa tau na nořa rasua hin Natuna Iesu Křisto, ale řa opoiopoiřa sohena Iesu mo retileu hinia isařa moiso. ²⁴ Ale haratu mo lo oloolo na retileu non God, mo lo toho hin God, ale God mo lo toho hinia, moiso hin malele akerihi natu, řa levosahia vara God mo lo toho isařa, matan Tanumena atu mo silea mo lo toho isařa.

4

Ha Pa Rasu Na Sava Hinau

¹ La tapalaku řuhuřuhu, ha sopo rasu na tanume tari vara la verea vara la lo retireti na suihan Tanume Tapu, pani ha vaihitera vara la tai isan God teni mo vono, matan přoet haluhalu matuvana la vano na varama moiso, ² ale kamim ha pa eři levosahia varařuhu vara sahara mo tai isan God sohen harihi: haratu mo verea vara Iesu enia Křisto, ale vara mo verea vara Iesu mo mai tamlohi varařuhu, tanume atu natu mo tai isan God. ³ Pani haratu mo sopo taviti vara Iesu enia Křisto mo sopo tai isan God, ha pa levosahia vara enia meresahi non Křisto sei ka rongoa moiso vara i pa mai, ale nake mo pete toho na varama moiso.

⁴ Natuvarihi, kamim non God, ale kamim ka jeu la meresahi atu moiso matan Tanumen God mo lo toho hin kamim, ale enia mo suiha mo jeu haratu mo lo toho na varama. ⁵ La meresahi nike, la tai na varama, ale matana, tamlohi na varama mo tapurongo isara matan la lo retireti na masalon varama.

⁶ Enra non God, ale la haratu sei la levosahi God la pa tapurongo isaŕa, pani la haratu la sopo levosahi God la pa sopo tapurongo isaŕa. Hin pososi atu natu, ra pa eŕi levosahia i ruhu vara hare mo lo retireti: Tanume Tapu atu mo varaŕuhu teni te tanume haluhalu.

⁷ La tapalaku ruhuŕuhu, ra pa opoiopoiŕa mata opoia mo tai isan God, ale haratu mo lo sile na opoia, enia mo vora isan God, ale mo levosahi God. ⁸ God enia opoia. Ale vara tea mo sopo opoi na tinapua, enia mo sopo levosahi God. ⁹ God mo vuhesi na nona opoia isaŕa sohen harihi: mo ŕule Natuna vorahese mo mai na varama matan vara ra pa mauri hinia. ¹⁰ Pulo opoia varaŕuhu enia mo sohen harihi; enra ra sopo opoi God tiroma, pani God mo opoiŕa tiroma. God mo ŕule Natuna vara i voli naŕihi na noŕa sasati. ¹¹ La tapalaku ruhuŕuhu, matan God mo opoiŕa mo tavera sohen harihi, mo ruhu vara ra pa opoiopoiŕa.

¹² Tea mo sopo lo hite God hin te pongi, pani vara ra opoiopoiŕa, God mo lo toho hiniŕa, ale nona opoia mo lo toho varaŕuhu na mapuŕa.

¹³ Matan God mo sileŕa na Tanumena, ra levosahia vara enra ra lo toho hinia, sohen enia mo lo toho hiniŕa. ¹⁴ Ale kama hitea, kama lo vereulia isana tinapua vara God mo ŕule Natuna vara i mai Jujuri mata varama. ¹⁵ Vara tea mo taviti vara Iesu enia Natun God, God mo lo toho isana, ale enia mo lo toho isan God. ¹⁶ Ale ra levosahi mo ruhu moiso, ra rasua vara God mo opoiŕa varaŕuhu. God enia opoia. Vara ra lo opoiopoiŕa, enra ra pa matea na mapuŕa peresi God, ale enia i pa toho peresiŕa. ¹⁷ Hin malele akerihi, opoia mo jea varaŕuhu matan vara ra pa

eři řomřilangi hin rani aria atu, ale matana, řa pa hahau sohen Křisto mo lo hahau na varama. ¹⁸Opoia jea sohena, i pa levuti nařihhi na matahu. Ale haratu mo lo matahu enia mo matahu mata řomřomi mata aria, ale mo vujangia vara nona opoia mo pa lo makire.

¹⁹Řa opoi God matan God mo opoiřa tiroma. ²⁰Pani vara tea mo verea vara mo opoi God, pani mo sopo opoi na voraina, enia tamlohi halu. Mo sopo eři hite God nake, pani mo sohena sava natu, vara mo vere vara mo opoi God, pani mo sopo opoi na voraina mo eři hitera? ²¹Retileu sei God mo sileřa hinia mo sohen harihi, “Haratu mo opoi God, enia i pa opoi na voraina.”

5

Jeu na Varama

¹La haratu la rasua vara Iesu enia Křisto, enira natun God. Ale la haratu la opoi God Tama, la pa opoi na natuna tari. ²Řa levosahia vara řa opoi na natuna tari hin posposi sei: matan řa opoi God, ale matan řa oloolo na nona retileu. ³Matan řa vujangi na nořa opoia hin God na nořa oloolo na nona retileu, ale mo sopo řilangi mata usurira.

⁴Haratu la vora isan God la pa eři jeu na varama mata nora rasua, enia natu, mo vaira la jeu na varama. ⁵Ale haratu mo jeu na varama enia haratu mo rasua vara Iesu enia Natun God.

Iesu Enia Hare

⁶Iesu Křisto mo mai na malele wai peresi na řae, mo sopo na wai hasena, pani wai peresi na řae.* Tanume Tapu mo vereulia matan Tanume Tapu mo varařuhu.

* **5:6:** wai peresi na řaena: wai peresi řaena mo roro hin rani atu tamlohi vuro matea mo urai Iesu. Hite: Jn 19.34. John mo ulia nike, vara řa levosahia vara Iesu mo lavi na epe tamlohi, mo sopo nunua purongo sohena hai la lo verea.

⁷ Varaʻuhuhu, hinau mo tolu la vereulia, ⁸ Tanume Tapu, wai peresi na ʻrae la turu na jara matea purongo.

⁹ Vara ʻra lo rasu na retireti nona tamlohi purongo, sava God mo vereulia hinia hin Natuna mo mele ʻuhuhu jea. Retivuhesi atu mo sohen harihi: ¹⁰ Vara ʻra tau na noʻa rasua isan Natun God, ʻra lo vujangia vara ʻra rasu na vereulia non God hin Natuna. Pani vara ʻra sopo rasu na sava God mo vereulia hinia hin Natuna, ʻra lo vereia vara God enia tamlohi halu. ¹¹ Ale vereulia atu mo sohen harihi: God mo sile na mauri tui moiso, mauri tui atu mo lo toho isan Natuna. ¹² Ale vara haratu mo lavi Natun God mo lavi na mauri tui, pani haratu mo sopo lavi Natun God, mo sopo lavi na mauri tui.

Vujangi Mata Mauri Tui

¹³ Na lo uliuli isan la haratu la rasu Natun God, matan vara ha pa levosahia i ʻuhuhu vara kamim ka lavi na mauri tui moiso. ¹⁴ Ale ʻra pa levosahia vara ʻra usiusi i usuri na masalon God, enia i pa tapurongo isaʻa. ¹⁵ Ale vara ʻra levosahia vara God mo lo tapurongo na noʻa usiusi, ʻra pa levosahia varaʻuhuhu vara ʻra pa lavi na sava ʻra usia isana.

¹⁶ Vara tea mo hite na voraina matea mo lo vai na hehe sei mo sopo matan vara i mate matana, i pa eʻi usiusi vara God i silea na mauri. Pani vara hehe atu enia hehe mata mate, i pa sopo eʻi usiusi matana. ¹⁷ Lejileji tari enira hina sasati, pani hina sasati tari la pa sopo sile na mateia.

¹⁸ ʻRa lo levosahia i ʻuhuhu vara haratu la vora isan God la pa sopo eʻi vai na hehe tarea. Natun God mo lo tingi horora, ale Tiapolo i pa sopo eʻi komora.

¹⁹ ʻRa levosahia mo ʻuhuhu vara enʻa ʻra tai isan God, pani tatuara tinapua tari na varama la lo toho na suihan Tiapolo.

²⁰ ʻRa levosahia vara Natun God mo mai mo sile na levosahi vara ʻra pa eʻi levosahi God varaʻuhuhu. Ale ʻra lo

1 John 5:21

11

1 John 5:21

toho hin haratu mo varañuhu, Natuna Iesu Křisto enia God
varañuhu, enia mauri tui.

²¹ Natuvarihi, ha toho asau na posposi mata lotulotu
vono.

Tangoa New Testament
The New Testament in the Tangoa Language of Vanuatu
Le Nouveau Testament dans la langue Tangoa de Vanuatu

copyright © 2010 Wycliffe Bible Translators, Inc.

Language: Tangoa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 19 Oct 2021 from source files dated 19 Oct 2021

89356e5c-df58-558e-9b27-ae0321adb2df